

পরিচয়

রুদ্র মুহাম্মদ শহিদুল্লাহ

এতো যে ভাঙন, ধ্বংস, রক্ত -
মনে আমার বয়স হয় না ।

এতো যে হাওয়ায় ওড়ায় স্মৃতি
এতো যে যে নদী ভঙছে দুকূল
মনে আমার বয়স হয় না ।

বাহিরে এবং বুকের মধ্যে
ডহয়ার ভেতরু হিয়ার মধ্যে
হারানো এক হৃদয়ে পাখি উড়ছে বসছে
দুলছে, যেন শৈশবে সেই দোলনাখেলা -
হায়রে , আমার বয়স হয় না !

বন্ধুরা সব বিত্তে বাড়ে, চিত্তে বাড়ে
বাড়ে শনৈঃ গৃহস্থলি,
আমার তবু বয়স হয় না, বুদ্ধি হয় না ।

একটি নতুন ভাষার খোঁজে
একটি ভালবাসার খোঁজে
যায় কেটে দিন

নখে এবং দাঁতে সবাই শান্ দিয়ে নেয়,
আমি আমার নিরীহ নখ ছাঁটছি কেবল
সবুজ মাজন কিনছি আমার দাঁতের জন্যে ।

হায়রে , আমার বয়স হয় না, সংসারী মন পোক্ত হয় না -

অন্ধকাণ্ডে শরীর ঢেকে সাবধানে সব হাঁটছে যখন
আমি তখন ভেতর-বাহির খোলা রেখেছি,
আলোর সামনে খুলে রেখেছি ।

আজো আমার বোধ হলো না ।
ভেতরে নীল ক্রোধ হলো না
পরান-গলা রোধ হলো না -

পাথর এবং পাখির মাঝের ফারাক বুঝতে সময় লাগে,
বৃক্ষ এবং লতার মানে আজো আমি সবুজ বুঝি ।